



鈴山堂集卷第十七目錄

詩

元日賜栢葉詩

紀賜十二絕

被命靈濟岱岳二宮廟上香夜行作

內直次韻

扈從夜歸經太液池

曉出長安見西山

西苑匾豆花

內直對雪有慶雪銀幣之賜



初誕孫賀賓宴集用往歲生男韻

誕第二孫豐前韻

子昂馬圖題贈大梁李中丞

贈仇總兵鎮守甘肅

贈別張甬川先生之南都

贈華學士視篆南院

贈僉憲白汝衡

少傅相公二郎偕第進士暮春宴城東王氏園

紀賀

袁守范君擢憲副九江贈以是詩

侍御楊明夫歸宜春因憶郡中園廬賦贈此句

侍御唐子薦謫判滄州作此慰之

贈馮侍御督學南畿

贈白因夫

贈子器之任建安舊任

贈易栗夫提學

寄陳顯仁僉憲同年

高氏義塾詩為致政司寇南屏作

送許仲貽之南京奉常

送胡少叅之蜀

送王克齋都憲總督漕運

以玉帶付東林寺僧并紀以詩予昔讀書此寺

送憲副敖君貴之兵備蘇州便道省親

送熊元直翰檢奉使還南昌

新治長安街西屋

內直守歲作

元旦紀事二首

冬夜宴別翰林邢伯羽熊元直給諫何思問

冊使諸藩給諫何時賓則出勘宣大功次

贈凌明府之宜春

詩餘

宮保王公浚川憶留都舊遊製木蘭花一闕見

贈輒次韻答之

月夕期浚翁文會疊前韻

答張少宰甬川疊前韻予往歲奉使湖南與少

宰會衡岳下登覽彌旬

和東坡大江東去詞三首

憶舊遊呈陸儼山學士

儼山學士示病中詞一闕乃有辟穀尋山之語

予廣其意而慰答之

少宗伯孫先生和東坡詞見贈依韻奉酬

鈴山堂集卷第十七

詩 南宮稿

升菴楊慎評點

元日賜栢葉詩

嘉靖壬寅正月一日欽蒙 皇上賜召勳輔同嵩

五臣于無逸殿饗以醴宴 諭曰以茲元旦召卿

等至少待亥刻歸庶吾君臣相慶嘉日焉已而出

金筒簪栢葉一枝賜各戴以歸臣嵩謹拜稽述古

詩四言一章識感遇云

王正啓祚青陽肇曆秘苑天開帝宮晨入 帝有綸

言曰慶嘉日爰奉明恩恭承寵錫其錫維何惟栢一
枝凌霜挺翠衰露含滋采自玄圃捧出瑛墀金筒簪
戴煒燁其光君子有酒稱彼瑤觴堅貞比節森鬱呈
芳以勗臣德以介元祥君子萬年壽考不忘

紀賜十二絕

賜銀牌子刻平安二字

銀榜頒恩重椒觴取醉歡新年占百福天語賜平安

賜銀像生人馬并太平牌子四

白金作像生奇巧出新製中有四雲牌懽觀太平字

賜金壽仙二

鑄就兩仙人黃金不壞身鬚眉但了了那記壽鄉

賜銀孩兒七

賜出銀孩美取義在宜男感恩先祝聖敬效華封三

賜新製貂鼠煖耳

貂帽頰露賜今番新製奇傳宣宵入直戴月出宮墀

賜絨錦護膝一雙

鮮華新製錦軟煖厚鋪綿長跪謝宸渥造膝玉堦前

賜銀魚百尾

寶坻產嘉魚纖纖白似銀貢來供玉食何意得嘗珍

賜長春酒每夕一尊

直舍燈明裏還攜應制文宵寒霜漏永賴此助微醺
賜酒懈一甕

入手霜螯美言從海市來甘香分御甕約客共春盃
賜橄欖

青果來閩嶠分珍出御函誰知辛苦後滋味有餘甘
賜御前色絲畫人物元宵卓燈一對

繪綵雙燈爛分輝自御筵玉堂留盛事何異賜金蓮
賜青油雨笠

帝宮催夕召蕭瑟雨聲來詔傳青笠戴賜酒殿中回
被命靈濟岱岳二宮廟上香夜行作

列騎騁浮塏秉炬粲繁星京陌何迢迢邈迤記所經
初辭苑西直忽逗城東垌祇栗承宸命宵駕不遑
寧清都闕真境瓊闕入紫旻雲徑深窈窕樓觀鬱亭
亭岱岳崇祠祀容衛儼白靈松檜羅茂蔭鬼物多獐
形伐鼓聞層閣焚香趨廣庭夜久新雨歇河漢轉晶
熒遲漏漸已徹嚴城猶未扃於焉紀于役聊以奉惟
馨

內直次韻

苑外層槐晝景移坐來直舍已多時天壇高處圍黃
幄惟見爐煙上玉墀

閣道傳呼彩仗移四更金海月生時歸來無逸衣裳
冷還傍星辰宿殿墀無逸殿名

扈從夜歸經太液池

波上千燈迴御舫柳邊雙仗引官騮清蹕一聲來欲
近驚起鳧鷖過遠洲

承恩長得禁中遊騎遍天閑十二驕行過荻叢風浙
浙不勝秋興滿滄洲

曉出長安見西山

六街盡日塵濛濛遠翠當前喜一逢知是昨宵新雨
過碧天雲淨看芙蓉

曉山微抹綠於鬢疊嶂層巒似可攀忽爾見山還自
樂何況仙人住在山

西苑匾豆花

荳花紅白滿秋天開傍金扉色倍妍內苑頻來還羨
汝因看籬落似村田

匾豆花開煙露繁却從禁苑憶鄉園那能歸種南山
舍步遶深叢未敢言

內直對雪有慶雪銀幣之賜

撲窓聞暮雪直宿殿廬深瑞集驚堆玉恩承喜賜金
三登占大有一德奉惟欽調燮曾無補惟勤夙夜心

初誕孫賀賓宴集用往歲生男韻二首

垂老見孫聊自慰更勞上客為予歡極知所得多叨
 幸况復非才屢進官乾坤錫佑嘉祥集門戶關心始
 願完寶軸牙籤過萬卷賜書他日要渠看
 在公夙夜真忘瘁剛為茲辰罄一歡天道總容仁有
 後世情徒羨貴為官堂開綠野歸難遂桑植成都志
 易完獨有寸丹期報主向來心事任人看

誕第二孫再用韻

又傳熊夢符新兆更藉犀錢續舊歡身事總知堪付
 子老年因歎未休官棠留錦水祥源遠

先高祖為桃
四川方伯

熟丹丘福果完為謝少陵歌抱送新詩都下盡傳看

二

甘露長春皆 上賜朝回開閣更留歡欲知湯餅筵

中客盡是蓬萊闕下官鳳沼敢云雛再浴監田因喜
 壁雙完一年兩度弧懸日佳氣充閭次第看

子昂馬圖題贈大梁李中丞

卷中此馬畫者誰毛鬣欲動骨法奇尺素能收上閑
 駿意態便欲隨風馳天閑十二紛相轟想是郊晴初
 出牧大宛雄姿宿應房渥洼異種龍為族金羈玉勒
 不須誇且看連錢五色花歛見麒麟出東櫪還疑駮

金山堂集 卷之七 五
駉涉流沙沙邊青草茸茸起上有垂楊覆河水圍人
騎放綠陰中參差駉牝成雲綺我觀此馬皆能過都
歷塊捷有神安得蕃息日適河之濱榆關已撤烽煙
警梁苑因同首宿春吳興妙手誰堪伍遺墨流傳自
今古人間駑輩徒紛紛哲匠旁求心獨苦擬將此幅
比瓊瑤寄贈佳人雲路迢天闕昔曾窺立仗霜臺今
復憶乘輅親持黃紙臨中土白日旌旗照開府臯夔
事業待經邦韓范威名先震虜氛祲潛消塞北場河
山坐鎮亦封疆戍卒歸來放戰馬嵩陽今作華山陽
吁嗟乎宵旰憂勤猶拊髀殊勲早奏明光裏願徵頗
牧入禁中坐令天下之馬休逸皆如此

贈仇總兵鎮守甘肅

出鎮河西當妙選眼中韜畧似君稀總戎正佩新金
印平虜猶傳舊鐵衣鏡鼓暗驚關月落旌旗遙拂隴
雲飛欲知皇化今無外首宿春濃戰馬肥

贈別張甬川先生之南都

四十年來同宦侶幾人還聽鳳樓鐘叨依玉樹形難
並欲賦江雲意轉重南國持衡勞水鏡中台補袞待
山龍百齡壽母躬扶持此樂人間豈易逢

贈華學士視象南院

北門學士金蓮貴南國佳人玉樹清
藝苑文章懸藻鑑僊都樓閣住蓬瀛
鈎簾鍾阜窓中近對酒澄江鳥

外明問訊玉亭修竹裏向來虛薄愧題名
院有玉亭題名于昔

視象于此

贈僉憲白汝衡

白雪詞高振國風干將豪氣擅文雄
當時門下慚知

遂今日吳中喜識蒙鴻雪謾憐孤跡遠
驪尊休惜白

分空岱宗渤海東巡地滿路霜威盡避駘

少傅相公二郎偕第進士暮春宴城東王氏園

紀賀

春園開宴沸歌鍾盛事嘉辰豈易逢
名向御毫題處

重恩從宮醞賜來濃浮煙故傍池邊柳
鳴雨先傳閣

外松更對翠峰移錦席幸於休沐得從容

帝京春望倍春光况際恩華合盡觴
扈聖久稱黃閣

老登科新愛綠衣郎近天章杜風雲會
聯榜郊祁棣

萼芳自是丹山雙鳳羽碧霄同日覩翱翔

袁守范君擢憲副九江贈以是詩

歌襦棠郡留遺愛建節霜臺拜寵榮
此去威名廬岳

重向來風節秀江清春城祖席維征騎
曉驛樓船動

水程別後相思何處所煙消湓浦暮潮平

待御楊明夫歸宜春因憶郡中園廬賦贈此句
宜春臺望倍春輝羨爾春還願不違奉使獨乘桓典
馬過鄉先著老萊衣鶯啼別嶠葳修竹路隱重江出
翠微問訊草堂松菊在待予端乞 聖恩歸

侍御唐子薦謫判滄洲作此慰之

君為懷遠吏我美懷遠政剖判若神明百姓稱衡鏡
井稅均以完比屋無喧競刻石紀去思至今留頌詠
一為柱下史持節按三秦澄清歌攬轡彈擊見埋輪
世途多險難大行在平陸屈子畏譏讒賈生遭放逐
朝遊金門署暮向滄洲宿君今滄洲去不用歎飄蓬

莊生齊寵辱老氏一窮通翻飛自有日加飯保珍躬

贈馮侍御督學南畿

學憲名高衆所宗更勞旌節過江東神謨敬覩諸曹
制文體全祛六代風臺裏奏彈封白簡江間吟眺對
青楓慈萱日有平安報楚水盈盈入望中

贈白因夫

督府遷官好南還慰爾心岸花牽別思池草發新吟
帆轉毘陵近江通建業深公餘饒酒賦隨處得登臨
贈子器之任建安舊任政和而有聲也

武夷峰翠靄氛氲九曲佳遊又屬君父老總傳河縣

政溪山應續考亭文仙鳧自識雲邊路逸驥寧隨櫪
下群遺愛好栽棠樹遍相期騰踏上青雲

贈易栗夫提學

含香頻直省中廬三禮周旋克相予辭闕紫泥承勅
諭行臺朱墨校文書尋詩却對花溪月叱馭還驅棧
道車漢室文翁風教在爲看遺俗近何如

寄陳顯仁僉憲同年

當年同日觀秋榜往事無人可共論惆悵西昌八枝
桂如今惟有一枝存

高氏義孰詩爲致政司寇南屏作

尚書歸卧南山日義孰開堂傑構新家有詩書遺世
澤人於耕鑿適天真雲嵐洞壑能成趣桃李門庭賸
得春何止儀形在廊廟德風還見淑鄉隣

送許仲貽之南京奉常

當年曾賦送君詩傾蓋真爲國士知芳桂早魁千佛
籍翔鸞今接九霄儀園林門帶金陵市俎豆山留玉
殿祠想見書遊多樂事清標誰不羨瓊枝

君昔計偕
上春官予
贈以詩

送胡少叅之蜀

罷起郎官草榮分岳伯符儉知魚飯美清伴鶴琴孤

古陌題堪續甘棠惠自敷江間雲鳥陣一訪武侯圖
送王克齋都憲總督漕運自舉進士至今予三

贈詩矣

釋褐今看八座時都門重續送行詩歷敷歲久官何
忝經濟才優衆共知節鉞兩淮開督府輓漕千里集
舟師暫勞國計輸籌策星履重來上玉墀

以玉帶付東林寺僧并紀以詩予昔讀書此寺
古寺東林記昔遊芙蓉爲徑竹當樓同時學侶誰還
在屈指如今五十秋

擔書徒步問程迷夜叩林僧借榻棲焚膏尚自驚殘

夢刻竹何因覓舊題

千年香火梵王宮人去人來自不窮鴻雪行蹤那可
問特留玉帶鎮山中

送憲副敖君貴之兵備蘇州便道省覲

渝水蒙山墟上居彩衣計日拜庭除寒星擁傳催旄
節朔雪趨程奉簡書城隱三吳開府地戰收千艦用
兵餘海邦坐鎮無戎檄聖代鯨波已晏如

送熊元直翰檢奉使還南昌

燕臺冰雪歲云除梅柳春堤引駟車奉使暫持天上
節儲才曾讀禁中書洪厓山對滕王閣綠水橋連孺

子居共道世恩承雨露早知文譽重璠璣

新治長安街西屋

長安第宅頻更主此地流傳亦到予巷僻能來長者

轍門高曾識相臣居還依綠樹留賓榻滿插牙籤貯

賜書愧荷 聖恩歸未得暮年猶自玷朝裾謝公木齋費公

鷺湖毛公礪菴皆嘗居此

內直守歲作 甲辰

除夕留西內君恩賜饌來既分辭臘麵亦進宜年盃

列炬宮墀映傳籌禁漏催爐殘知夜永鍾動識春回

上吉日賜辭臘麵

元旦紀事 乙巳

籠燈拂騎趨南苑魚鑰金門次第開歲歲元正蒙遣

命永明殿裏上香來殿祀羲農堯舜禹湯文武周公孔子

栢林椒徑遞經過院院焚香燭焰多行到鳳樓天未

曉千官簪笏候鳴珂

冬夜宴別翰林邢伯羽熊元直給諫何思問

冊使諸藩給諫何時賓則出勘宣大功次

此夕漢京懽聚首德星還共使星明玉堂青瑣歸英

望龍節仙輶賦遠行絕塞曉煙收戰馬上林春木待

遷鶯馳驅總入皇華詠願采民風慰 聖情

贈凌明府之宜春

雲中仙舄幾時回闕下離尊且共開賦稅及時宜報
政江山多勝可登臺栖遲愧我懷鄉念撫字勞君作
吏才已築野堂開將徑此身何日賦歸來

予近治第宜春

詩餘

宮保王公浚川憶留都舊遊製木蘭花一闋見

贈輒次韻答之

記當年携手陪夜醉愛春遊看鷺渚波晴鳳臺花暗
覽勝尋幽屢在佳人投贈青玉案瓊玖愧難酬郢客
調高白雪巴歛堪息吟謳塵勞奔抗幾時休重回

頭歎往事成陳風流雲散煙浪悠悠不知今夕何夕
重來此燕月對清秋謾憶丹山碧水却憐高蓋華軒
月夕期浚翁文會壘前韻

咲萍蹤南北賴陶謝與同遊正鳳閣紉書烏臺執簡
地峻人幽却喜自公退食多暇日心賞若為酬但得
高朋嘉話底須趙瑟秦謳眼中世事醉中休向城
頭見宿雨清塵明蟾出海良夜悠悠已辦金魚玉珮
沾美酒高咏薊城秋聊共西堂秉燭且須南陌停輶
答張少宰甬川壘前韻予往歲奉使湘南與少
宰會衡嶽下登覽彌旬

念楚天衡嶽弭使節奉山遊正天柱開雲朱陵飛瀑
洞古峰幽元是金蘭契誼重會合紵編遞相酬人道
玉堂仙侶詩成四野傳謳別來夢想未能休却轉
頭看世事如棋年華似水鴻燕悠悠何意仍携末路
咲老圃黃菊耐深秋共向彤庭結綬還來紫陌聯輶
和東坡大江東去詞三首

憶舊遊呈陸儼山學士

記得當年携客棹曾覽吳淞風物黃浦磯邊芳草逕
因叩朱門素壁宛似遊仙真同憶戴夜泛山陰雪揮
觴覓句不讓一時才傑祇今遙指江雲重吟海樹

高興依然發四十年來同宦侶不覺飈馳星滅槐省
垂魚鳳池鳴玉相對俱華髮君恩報了五湖重訪煙
月

儼山學士示病中詞一闕乃有辟穀尋山之語
予廣其意而慰答之

玉署仙翁綠底事身病偶須藥物杜老吟詩因太瘦
却憶尋山面壁世事浮雲利名蝸角去住憐鴻雪荆
州爭奪空嘆昔時豪傑只須滿引金尊高彈錦瑟
四座燕歌發秉燭觀遊聊此夕莫問人間興滅松栢
凌寒桑榆收晚勲業看黃髮木天蘭省正要平分風

月

少宗伯孫先生和東坡詞見贈依韻奉酬

蚤歲相逢知風骨自是玉堂人物二十年來官未調

興在丹崖青壁雲海為家柴門擁榻高卧素安雪青

宮華省一時登用才傑 好似鵬鸞乘風驂騶騁步

得路爭先發共喜虞廷逢聖治關塞虜塵新滅幸接

仙寮欣披藻翰森爽清毛髮寅供三禮光近九天日

月楊日三填詞皆合作

鈴山堂集卷第十七

鈴山堂集卷第十八目錄

頌

大禮告成頌

聖壽無疆頌

萬壽宮頌

霄殿紀成頌

靈雪頌

禱雨靈應頌

禾麥重祥頌

白鵲頌

鈐山堂集卷第十八

頌

大禮告成頌

有序

蓋主上執珪璧于南郊聿懷多福者舊矣是歲戊戌則恭拜玉冊尊上泰號厥典鴻鴻曠乎無前先是上萬幾之暇凝神穆清默乎深思親灑宸翰咨于二三大臣上意若曰我國家丕受大命太祖創業成祖繼志垂七聖以至于今海宇宴清協氣洪鬯萬寶崇成者上穹之保艾也夫人君嗣天稱臣稱子秦漢以降世主惟務已崇侈而皇皇上帝大號

金華山堂集
弗薦匪尊匪親厥義謂何既又曰肆予冲人不績鴻業獲承燕翼者 二祖之付畀也 皇考之啓佑也而神功聖德微稱未協厥義謂何吾欲以季秋之月辛巳尊上 成祖 睿考之稱以仲冬之朔辛未尊上 皇天上帝 皇祖太祖之稱二三大臣頓首仰讚稱善以及在廷之臣悉若悉欽 皇上廼勅禮官具儀來聞復抒睿思親製冊表厥義弘遠厥文煥敷廼前期甲子以尊上 天稱預告群神于南郊之前丁卯 勅召諸臣曰太師勛爲知園丘拜冊總禮使曰少傅言爲同知冊監禮使曰公希忠侯元爲捧冊

表進受使曰尚書高譚恭道奏輿曰太子太保鼎

爲上香詣燎使曰公溶伯鐔鑣爲 北郊 大社稷

帝社稷遣告使曰大宗伯嵩爲知 太廟上冊監

禮使暨捧 八帝王官俱遴簡以充發輿之夕凡事

于郊者人授簡一 御筆署曰敬之群臣震懾奔走

率職庚午始晦是夜既丙至于南郊 皇帝御大次

端默疑几若覲若思繁儀未舉精意已塞嚴鼓載作

千燎具揚 皇帝被袞執玉升于泰壇于時也五曜

垂映穹宇朗清煙篆裊芬燈燭粲輝髣髴天神陟降

在上禮成 皇帝廻軫旋官是日既午再事于 廟

于時也瑞靄商雲和風煦日鬃髯 祖考悅懌來假
嗟乎非至德純孝其孰能動天之速如此哉天其以
是寵綏我 皇上永命我國家億萬載無疆之慶哉
昔孟子曰天不言以行與事示之而已矣先王齊明
以享帝夫帝之享否雖聖人未由知之惟休徵者其
享之聲也洪惟我 皇上禮行于大享而景雲瑞禮
行于冊拜而氛祲銷陽景煥茲非以行與事示之之
驗乎臣承乏禮官與聞大典謹備著其實予以昭景
貺告成功拜稽首而獻頌曰

皇矣上帝於穆不已實昇聖德立民之紀民紀維何

曰本曰始賦理成形萬化攸啓莫大匪天莫尊匪祖
惟 皇敬事憲法述古謂天子我一氣相承太號未
欽夙夜靡寧誕告在廷罔不欽若肅肅宵邁執事有
恪牲幣矢虔冊于皇天天帝歆受億萬斯年皇歸自
郊載見 烈祖奏禮陳儀籩豆有楚皇在清廟穆穆
雍雍皇后助獻命婦亦從凡此駿儀維聖之謨秉心
淵塞匪觀是圖睿思先天鴻猷復古基命夙夜惟敬
作所萬邦作孚受天之祜禮臣司章敢頌純嘏

聖壽無疆頌有序

臣聞功高不宰者其積斯弘德合無疆者其徵必壽

故天皇萬八千歲帝舜百有十年皆登不老之鄉並
在長生之域矣載觀往牒詳攷遐年則知代有明王
必昭於瑞應時逢景運每見於靈符是故軒轅開繞
電之祥少昊紀流虹之迹唐堯著赤龍之感商王本
玄鳥之命討緒推源其事一也洪惟我 皇上二極
凝真千齡肇祚抱元始之上德躬自然之大道化協
無爲之妙心涵有象之初乃仲秋十日寔維誕聖之
期時也序移玉律運撫瑤圖垂衣裳而御紫微開閭
闔而臨黃道虹氣薄霄三靈之欣可接嵩聲動地萬
國之慶皆同藏山秘澤之珍五穗連枝之異並至如
期兼呈不爽是豈非昌時之嘉應祺壽之玄符也哉
若夫臣子之義對寵靈揚休命祝華封於堯年歌天
保於周代斯固就日之微忱祈天之宏願也 臣嵩謹
拜首稽首而獻頌焉其詞曰

皇明八葉景命維新篤生我 后乃聖乃神大寶初
升靈符載啓仰正天軸遐清地紀冲襟內蘊神化旁
宣包羅象外希夷帝先赫赫天都洋洋神宇享報有
嚴精煙畢舉祈穀重農祀雲閔雨以育群黎以安萬
寓禮豐珪幣樂盛箎簧虔情感福休氣致祥秀岐挺
異嘉穎擢芳年登大有化極明昌五令乘秋千齡毓

聖紫電晨輝瑤星夜映雲聚璿華河澄水鏡天地交
歡華夷協慶惠覃窮髮燕及左衽職方納貢王會輸
琛郊馴奇獸苑集祥禽露湛堯莢風調舜琴政合清
寧域躋仁壽鴻業彌光燕貽孔厚岡陵匹永松柏儷
茂大德難名古今罔紹慶流有截道入無垠祚軼巢
氏齡踰燧人佑命其申蕃釐孔錫受天百祿以莫不
益我 皇萬壽與天無極

萬壽宮頌

有序

維是宮乃我 成祖文皇帝基命肇興之地舊名曰
仁壽 皇上臨御于茲既閱數載荷天之休膺受符

祉動罔不迪于吉於是嘉進其名曰萬壽宮宮之後
爲五福殿又次爲百祿宮並以昭申錫之帝命表弘
遺之祖烈也爰卜剛辰奉揭新額煥赫穹窿拭目改
觀臣蒿仰而歎曰自昔君天下者必起自厥先興業
造功震耀區宇是以本深而葉茂德厚而流光子子
孫孫承之無極洪惟我 成祖文皇帝建都燕冀適
啓丕基征服綏來綦隆天聲以致際天不冒亘地砥
屬稽其肇跡之地實惟茲宮焉九葉龍興恭遇我
皇上以上聖纂鴻業乾健而正離繼而明即祚以來
繁臺殿館弗之有御獨念是宮爲 皇祖肇基福域

乃又適於居而三靈協佑百神效職日星軌道光明
清潤風雨若時歲乃以穰豈非天心篤厚眷顧有在
邪臣考詩書所稱曰萬壽無疆曰歛時五福曰受天
百祿蓋人主所以承天而臨御其臣民三者備矣斯
可謂久安長治我皇上取義定名蓋欲敬保天監
而期綏安於祖宗所受于天之民也豈專已享而
已哉自今而後聖躬恬願保合太和介軒轅之昌筭
引虞舜之修齡諸福之物可致之詳引之而愈盛則
天下臣民何其幸歟古詩頌者所以美盛德告休徵
也臣是以不勝惓惓謹拜手稽首作為頌詩以獻宸

宸其辭曰

赫赫皇明膺運握符於烈 太祖金陵闢都 成祖
繼天燮伐大定駐蹕全燕奠鼎凝命周宅鎬京殷居
亳邑履重馭輕四方之極有宮穹穹禁苑之西名曰
仁壽高朗軒夷寔惟斯宮肇基帝跡創始鴻圖貽謀
燕翼爰二百年我 聖龍翔受命中興于 二聖有
光以聖繼聖克復其始迺夜斯宮迺慰迺止金梁駕
漢玉棟干虹王氣榮光鬱鬱葱葱 皇曰我 祖明
德斯肇予實嗣之曷循曷紹累厚增高重基壘構特
易隆名嘉進萬壽壽考維祺自天之祐承以五福範

行箕疇康寧好德申命用休百祿承次坤儀用彰安

貞之吉應地無疆南闕端門麗于陽德南門名法天行

健四隩咸宅耀曦左門名秩秩寅賓出日亦有輝朗右門名

素月澄璧陰陽之精左右互弼皇居皇處匪曰

豫佚景綜萬幾咸釐庶蹟志加窮閭念軫民食亭翼

幽風殿峙無逸南闕穀壇以祀于稷北隣桑壇后歲

親蠶德如關雎教形葛覃允矣風化匹于二南維昔

農桑王業之自皇宅于茲肇修苑事分條建規補

弊興滯皇心翼翼齊明莊栗昭事上帝靈威可質

賜福降祺百神效職衍于列祖享祀一堂衣畫袞

然珩瑀瑒瑒天眷聖皇而安而室俾爾熾昌俾爾

多益長發其祥螽斯蟄蟄天眷聖皇壽萬斯年綏

以繁祉受祿于天天耀景星地溢醴泉玄龜薦瑞朱

草呈鮮四方賀焉四夷服焉我皇御曆曷有極焉

微臣稽首敢獻斯篇

雩殿紀成頌

嘉靖癸卯夏四月丙戌我皇上新作雩殿成昭靈

貺也先是壬寅之夏時雨偶愆旱熯為沴皇上為

民軫念即苑內之太素殿建壇致禱于神而甘澤隨

霈歲以有秋於是仰帝眷之洪垂嘉神君之效職思

以崇厥報者廼發淵衷諏剛日即舊基構靈宇以尊
事于神焉其地匯以金海帶以瓊山連漪澄浸鏡涵
一碧之天峯巒翠嶺鰲戴三山之軸宛然蓬島瀛洲
閭風玄圃之上允爲仙聖之所宅神明之攸萃也既
成規模閎偉地位肅嚴前爲雩禱之壇其後爲太素
殿以奉 祖宗列聖神御齋館列峙榜揭輝映臨海
爲亭曰龍澤曰龍湫東爲弘濟祠經始昨秋至是而
告成焉臣謹按先王制禮法施于民禦大菑捍大患
者則祀之故山林川澤能出雲爲風雨見怪物者靡
不載在祀典周禮孟夏大雩爲民祈祀山川百源洪
惟 皇上竭一誠以感通代萬方而祈福斯殿之建
昭昭神靈必永依于斯動彰顯應時雨時暘爲祥爲
吉以遂我 皇上之所祈矣臣式瞻鴻構恭覩駿儀
敬作頌辭用紀成績其辭曰

於赫上帝制運太清爲民選辟以宰群生於穆我
皇統乾作聖圖治保邦夙夜維競粵在昨歲亢熯荐
臻 皇曰艱哉曷拯我民爰事于神旣禱旣禋百神
效靈龍澤隨霈歲登豐穰民罔菑害 皇曰休哉明
明帝賚曷其欽承以報神惠廼命司空廼相厥土鳩
材庀工作此殿宇神贊其謀地呈其吉始自去秋功

成不日虹梁架漢霞棟于霄璿宮寶殿轟屹岩堯三
成絢錦九陛駢玉鳳彩龍文怵精炫目工徒告訖皇
情豫懽陳儀備典奉以攸安妥侑有所神則來格九
光璀璨萬靈翕赫風馭雷車洋洋在列龜鼉龜魚百
恠蜿蜒恍惚變幻瀆薄周旋滴滴寶淵神龍之宅飛
騰大空妙化頃刻時作甘霖以救旱竭我 皇乾乾
敬恭明神一念所祈惟國與民惟聖感神惟神輔德
歆乃精誠報以休澤休澤維何介福寔多出入訶護
保合太和雲行雨施應禱而致醜胡寇賊潛驅默制
弘殖天民永綏皇祜鎮我 大明億千萬祚

靈雪頌 有序

皇上寅奉天命憂閔元元先是庚子之冬愆暘告尤
時雪不降 皇帝曰嘻茲惟歲稜茲惟民艱予職元
后厥罪在予乃竭誠禱既歷兩旬雪猶愆期二氣
交而弗融群情沮而無澤 皇帝齋心靡懈益虔露
禱摠誠為民請命至德感召彤鬻有孚乃以改歲正
月朔旦玄雲四布瑞雪斯降初霏微以灑空遂濛密
而布宇于時五漏漸稀四門甫闢萬邦來同百寮咸
集寒色凝曙輝積光搖白玉之墀色映黃金之闕雍
雍者滋豫肅肅者增慄咸獸舞雀躍欣然而相告

曰美哉祥乎斯聖王之瑞乎夫元日者履端之始三
白者豐登之兆憂民者帝王之先務敬天者君人之
大德也仰惟 皇上道超邃古念軫烝黎慶逮遐方
精通無朕天威憐而旋享蒼生罪而還福視湯罪已
而澤降景仁言而災退寧不有過之哉臣嵩職在秩
宗預聞祥祲謹按西京雜記有曰太平之世雪不封
條凌弭毒害而已茲者豐隆按候滕六兆祥辰協三
元瑞呈盈尺傳曰耆欲將至有開必先然則茲雪之
應誠聖德昭著高穹降格國家億萬載太平之休生
靈有永之福其端在此也昔南宋孝武時元日飛雪

集衣時以為瑞賦詩稱賀矧今

聖主為民憂勤所

感非前事之比臣用是不揣蕪陋謹援据古義拜手
稽首而獻頌曰

於惟 聖皇覆育我民為民祈食用禱于神粵歲之

冬雪不時降恒暘作沴民憂失藝亦懼疵癘 帝曰

艱哉哀我農夫變不云恤時予之辜惟 皇默籲群

祀攸秩融假靡寧將事有惕惟精乃通維一乃格曷

其應之月正元日元日惟戊亥靈斯集藹藹浮浮灑

灑奕奕庭列瑤堦連璐重璧既濡既渥具曰沾足宜

我來牟寔含茂育嘉谷茂止百室盈止乃京乃坻自

今伊始拂癘蕩瘟納于太和轉沴為祥易歎而歌赫
赫天命我 明受之穆穆 聖君自天佑之天佑伊
何允文允武懋明俊德紹隆 二祖惟 皇建極永
綏兆庶六府孔修三辰順序燠寒罔愆時暘時雨維
天眷德駿發靈祥佑此萬方豐年穰穰豐年穰穰頌
聲洋洋 皇帝德功萬世不忘

禱雨靈應頌

有序

洪惟我 皇上德備聖神道參天地恪存一敬對越
三靈乃嘉靖癸卯夏四月不雨 聖意廼曰禮有大
雩茲維時矣爰按儀禱澤祈穀實以裕生民聖躬勤

虔夙夜齋惕禱之三日為五月丙午入夕靈雨獲降
戊申雨復降綿延竟日不疾不徐旣優旣渥朝野臣
民鼓舞懽頌是誠大眷聖德豐年之祥兆太平之嘉
應也於是臣蒿恭拜稽首颺言而作頌曰

於穆上帝佑我 皇明基承熙洽治底隆平聖治旣
至聖心愈惕謂國依民謂民依食雨暘時若寔賴神
功昭貺妥靈肇作新官按禮陳儀曰大雩祀古有舉
之曷其敢廢爰諏吉日保穀祈豐披誠瀝悃以告皇
穹皇穹來歆萬靈咸集海若承符川祗效職籟隆鼓
炁屏翳嘘雲九龍澍澤時雨惠零雨之未臻陽亢陰

金山堂集 卷之六
伏雨之既臻優渥沾足始于壇時旋遶郊圻瀰漫靈
霽有滄淒淒雨我公田徧于率土百穀蓊蓊庶草繁
廡我 皇聖德上格于天隨禱而應景福斯駢維此
樂歲宜稼于田工歌于廛農歌于野師歌塞垣士飽
騰馬戎虜潛驅永奠中夏小臣作頌以告萬方祝我
聖皇萬壽無疆

禾麥重祥頌有序

夫天心與人事流通君德與休徵協應茲理著明不
可誣已然王政多端而食貨之資爲急祥類非一而
麥禾之瑞爲先洪惟我 皇上欽若昊天勤恤民隱

於凡陰陽寒暑雨雪之候稍有愆越輒齋心竭誠禱
于上帝是以三靈協應六氣調平雨暘時若年穀豐
登乃是歲之夏嘉禾產于內苑同本雙穗者多至數
十又麥禾一本二穗或四五穗者並產于泰岳之陽
守臣以進聖心感悅臣謹按春秋于他穀不書而麥
禾不成則特書之是故民食者聖人之所重也瑞應
圖曰嘉禾五穀之長王者德茂則生故瑞應之來惟
其所召粵自夏初 皇上祇雪禱雨爲民已而甘澤
大降中外固已預卜有秋之望矣乃今禾麥並瑞天
眷不違地寶斯獻 皇上茂德所致豈不彰彰明甚

矣乎昔我 太祖高皇帝時定鼎則寶雞之來聯穗
而生治成則龍門之禾合仍而茂然亦異地殊時至
我 皇上盛美重祥則繼 聖祖之盛而兼隆者矣
况夫靈鍾內苑見聖化重穡之始焉秀稟東岱見生
德發育之盛焉州名泰安見太平極治之符焉薦之
昊極獻之清廟予以彰天貺慰祖靈誠越千古而僅
見掩百王而獨盛也 臣敬述蕪頌庸備康衢之謠庶
效詞臣之職云耳頌曰

有禾油油于帝之疇同本異莖既碩既修龍枝濯露
瓊粒凝秋有麥穰穰于岱之阡兩岐旁秀五穗連蜷
亦有嘉穀珠寶金駢融氛液瑞有燁其鮮黃髮
以告司牧司牧曰嘻是謂瑞祉諏日函圖以獻天子
惟此穀麥民食攸資二瑞荐臻並產一時自古未有
皇則獲之於維玄穆顯相我 皇誕降嘉種畀此
下方於 皇克敬寅保明命昭事翼翼夙夜維競山
澤受方雨暘戒令物異匪稱年豐爲寶 皇有茂德
格于 穹昊薦之 列后蕤蕤煌煌有秩斯祜申錫
無疆昭受天貺以告萬邦

瑞應白鵲頌并序

嘉靖十年七月有白鵲二產于河南之懷慶鄭王詎

日馳使獻之闕下 皇帝受觀疑穆謙冲曰於惟嘉
哉茲惟上天降祥以佑啓我國家茲惟 皇祖 皇
考茂德垂蔭以肆于眇躬其曷敢承乃詠日獻之
廟獻之 兩宮又明日詔群臣百寮觀于朝以同其
休群臣百寮怵踴喜躍舉手加額以謂我 皇上神
德聖功格于昊穹昭茲瑞應猗歟休哉於是禮部臣
嵩不揣蕪陋謹作頌曰

於赫 皇明我 后中興景命既集大業是承惟
后濟哲恭已萬國聖敬日濟王猷允塞丕顯文謨丕
承武烈法天之道順帝之則惟十之禋肇肅郊禋乾

坤交泰日月貞明九功惟叙百禮告成天監在下明
德惟馨爰有二鳥來獻其禎自彼宗藩貢于帝庭其
鳥伊何曰維靈鵠皓質白章其儀濯濯 皇帝曰嘻
是天之祐昔在 文祖天命二鳥降于京土肆乃獲
予覩載翔載集載鳴載舞雉飛越裳鷺振西靡翩彼
二鵠實備斯容覽德而至希代乃逢乃命奉常醴齊
粢盛薦于清廟肅肅其敬乃獻 慈宮燕喜欣欣以
介眉壽弗祿來成乃卿士百辟歡怵稽首對揚王休
天子萬壽 天子萬壽坐于明堂去讒遠慝顯忠遂
良天耀前星煜煜煌煌 明受命溥將白天申之降

福無疆微臣作頌以告萬方

鈴山堂集卷第十八

鈴山堂集卷第十九目錄

序

文華盛紀序

贈石潭汪先生序

贈大宗伯夏公序

送丘潮州序

送翁少叅序

贈李宗介序

送僉事李君序

贈王子儀序

贈胡用甫序

贈嚴明府序

鈐山堂集卷第十九

序

文華盛紀序

文華殿為我朝列聖講學之所皇上懋崇正

學慎徽彝典顧殿之東室舊設佛像乃命撤去以伏

羲神農黃帝堯舜禹湯文武周孔數聖人製主設位

而祠焉冬十二月丁丑惟奉安之期夜漏四十刻

上親奠告輔臣禮卿講讀儒彥咸預在列籩豆苾芬

鐙燭粲輝仰瞻在上如數聖人復生既上御西室

天顏睟怡玉音煥發進諸臣而諭之曰朕奉聖

師以爲景慕進修之地然啓沃交修實望于卿等罔
朕棄於時諸臣咸欣踴感奮自慶夫千載一時之遇
禮部尚書臣時退則恭錄 聖製祠告之文祗承之
諭及諸臣陳謝之疏刊爲書以昭示天下而謂其
僚嵩曰子宜叙夫所以刻茲編之意臣嵩謹拜稽言
曰 皇上茲舉也而衆善具焉正祀一也原統二也
納誨三也佛氏之說乖義數倫誣惑民志夫正祀則
異教屏矣義農黃帝堯舜禹湯文武居君師之位出
治教以行道於上周公孔子雖無其位而有其德制
禮述經以明道於下聖聖相承繼天立極實啓道統

之傳此萬世帝王之師也夫原統則聖學明矣山嶽
集土壤以成其高河海得衆流以助其大明王藉賢
正以弘其德昔高宗於傳說期之以啓心沃心喻之
以鹽梅舟楫夫納誨則衆善達矣夫是舉也三代而
下吾未聞矣嗟夫非大聖人其孰能與於斯此天所
以開億萬載太平之休豈偶然之故哉夫摹天地繪
日月則難爲工 皇上聖德峻功宏謨盛製詎可以
言詞殫述茲紀也特 文華之一事耳而下土之臣
誦不煥之文仰惟皇之極其有不遵義迪德復性合
中者乎臣無似願與臣庶共勉之茲固臣時所以刻

茲編之意也

贈石潭汪先生序

石潭先生既謝事居蘭坂之上境號殊絕兩溪環流
竒峰萬疊烟靄蒼翠恍與世隔良田平野魚稻蔬果
無求于外而足予往歲北歸自上饒趨弋陽捨舟問
道所由以候公時日將晡山行三十里深阻蒙翳稍
近聞溪流澎湃洶號萬木間涉溪尋徑以抵公之廬
秉燭促席語如夢寐翌日周覽溪上還坐層碧之樓
公指山雲語予曰子知夫雲乎始觸石冒嶺才膚寸
碧耳稍洩洩然蓬蓬然其碧漸增其層見溢出輪囷

疊積瀾漫渤鬱隱見諸峰間積已倏散或散而復積
頃刻萬變而吾得靜觀焉蓋樓之勝於是爲最故以
層碧名焉嵩起愀然曰公誠樂于此乎夫君子遭世
之理奮庸熙績使君受其益德澤加于當時名聲流
亾無窮是故嘉唐虞於上世思殷夏於中古許身稷
契邁迹房杜斯哲人之令猷志士之休烈也其或遇
合乖於幾微常變形於造次江海懷魏闕之憂平居
與漆室之歎則有撫景不怡當食忘味者矣若夫茹
芝商巖洗耳潁濱麋鹿之與處猿狖之與居置理亂
於弗聞託高間以自佚韓子所謂獨善自養不憂天

下者之所安也豈世所望於公抑公所自待者哉公
嘿不應於是予來京師二年矣聞公攝養益完關距
益固縉紳大夫道境上有欲造者往往以疾辭雖親
識罕得見其面仲氏少宰公築第邑之西谿歲時往
來山中相對觴咏賞析為樂予方恨二公之遠奉教
之無期也為造雲山之歌以寄予仰止之思因季氏
侍讀君有之歸而獻焉以為公壽歌曰萬壑兮千峰
宛天臺兮崆峒被幽巖兮芳荏蔭白石兮長松山中
兮何有白雲兮日霏霏以承雷辛萸葯房兮薜荔為
牖我處我遊兮樂且無咎雲出兮英英矯游龍兮上
征雲歸兮何所忽聞寂兮山之岵亶舒卷兮何心
嘯我吟兮我道與伍嗟山人兮列僊佩明月兮霞冠
騎玄鶴兮下上斲松苓兮永年群龍兮滿朝威鳳兮
天路蹇胡為兮山中獨淹留兮遲暮攀雙桂兮瓊枝
望雲山兮孰知我思

贈大宗伯夏公序

今 天子以上聖之資稽古崇禮圖惟治功期登斯
世於三五而猶以知人得賢為務之先公卿而下或
謀揆政治或正定禮樂或賡歌風化皆得密邇衮黼
親承詔諭其有奇才瓌行足當大任者必簡在淵

衷既久而親試其然然後超用以觀厥成若今大宗伯桂洲先生夏公其一也公始起官給事中正色立朝知無不言辨忠邪抑僥倖糾弊慝軍國大政獻替爲多歸然諫垣之望然未有以表異也會建議親蠶及郊廟諸禮一日天子召見便殿賜敕若曰爾自居言官多所建白皆爲國爲民甚有裨益而耕蠶二事又見所以爲朝廷廣思忠愛之心朕特嘉爾忠賜四品服色降勅褒諭於是在廷之臣莫不動色悚嘆以謂上簡注於公者久矣自是親寵日隆未幾陞侍讀學士仍掌諫垣又特賜金犀束帶未幾陞少詹事召入翰林爲學士未幾進貳禮部遂正位宗伯未及期年超進六列晉錫便蕃冠絕倫類觀公所遇合豈非明良相遇千載一時哉高嘗感於古君臣之際矣雖有興理願治之君而不得其臣德業無自而弘雖有懷竒抱傑之賢而不遇其君謀謨無自而著夫莘野膺三聘之勤板築副爰立之望不可尚已後世若唐太宗馬周一見歡若魚水言聽諫行顯爵美秩畀之無所惜宋哲宗拜蘇軾翰林學士賜對衣金帶夜召禁中嘆曰竒才使二臣者不遇二帝亦坎壈羈旅沈鬱庶僚耳然周以常何之薦軾以神考之知若

公者非有因緣憑藉之資崛起恒列躋于大僚茲實
惟 聖天子知人則哲之明遠追古帝王而非後世
之君所能及也高憶公始釋褐時嘗召試館職有司
者偶失選掄當時論者深致夫遺珠之嘆詎知夫材
鉅者用宏積厚者發駿天之成就英賢固自有在耶
公方爲霖爲礪攄堯舜君民之志匹休古名臣之業
以贊翊我 聖天子中興之盛治所謂馬周之奏疏
蘇軾之文章蓋不足爲公道矣而遇合之奇適有相
類者故予特備論之以諭諸吾黨之士相與慶公之
有遭而觀其成焉

送丘潮州序

潮爲州在南海萬里外限以五嶺匯以重溟鳥道蔽
日鯨波浴天島夷卉服言語莫辯前代仕者恒弗樂
至其地韓文公至其地人始知書則去中國遠且陋
故然矣 明宅有天下環海內外視同戶闔置吏分
治其守長缺率簡廷紳有文行材諳者往踐其任擁
傳褰帷崇顯威重與內郡埒潮之士觀藝上國射策
決科召居金馬石渠之署彬彬然與國士偕焉夫其
生窮海之崖革擴陋之習興文儒之教非皇化遠被
耶化之所被雖草木頑類飛走異彙罔不咸若今之

金山堂集 卷之九
惡溪有冥頑不靈為民害如鱷者乎異時鱷雖冥頑不靈為民害韓公文而驅之鱷輒避徙去異類猶爾矧今士皆知學文教蔚興時乎然則潮之俗易諭其民易格其為令易行化易洽可知也禮部員外郎丘君主靜擢守潮州君之去也無昔人不樂至之嘆奉宣天子德意治教斯民吾知其易易然矣予聞潮之東有山焉韓公嘗登覽植木其上邦人因稱其山為韓山木為韓木景仰嚴祀有堂有祠君子流風遺澤為世所慕如此主靜其尚往而求之哉

送翁少參序

德與位其進也必有漸乎王者制用賢之典布內外百執事以分理天下之務掄材計考小大承序摩以歲月使其人安乎其卑而頌之以久觀乎其成而無覲乎其速涵濡培植以粹其德也更嘗練習以達其材也砥礪濯磨以潔其操也三者君子所以漸於進也易漸之諸爻皆取象於鴻夫鴻之為物時至而群序自干而磐而遠有漸進之義焉今夫木之始生也拱把尋丈耳其既盛也鼓之以雨風飽之以霜雪厚之以土壤挺然勁蔚然喬矣其久也橫澗絕壑干雲霄而蔽日月矣無他進有漸也君子蓄德居善以馴

致崇顯何以異於是翁君進吉起家蜀瀘觀藝於京師銓授得吏部司務君低徊其間餘七年稍遷祠部員外郎進主客郎中又三年擢拜廣東布政參議於是去下而即崇矣其察察榮之相率請於大宗伯李公屬予言以爲行贈予知君質厚不浮敦朴有裕管職治事循循然安之所謂湏久而不失其漸者歟往哉無亦惟是令德之是圖焉振儀天路作棟明堂吾於子乎觀之矣

贈李宗介序

宗介將之泰安之任今大宗伯厚菴公其伯兄也公

語之曰士筮仕得五品秩爲大夫出專方州不已榮乎饑寒疾痛下有欲也於我乎求遂簿牒期會上有委也於我乎責成不已難乎夫履寵思辱居難思殆子如何而可宗介聽以請曰願有教也他日公語諸嵩曰吾弟猶介人也少從吾學日坐一室執冊而誦思顛顛焉疾風冥雨之弗知也非其人不妄與之交性所不合不與之言吾患其不諧於政也嵩曰夫猶孔子之所取也宗介誠猶於守官也公無患耳矣夫人之性各有所受也尚大者喜功其智足以集務其弊也或放而不制惡通者明節其執足以矯俗其弊

金山堂集 卷之九
也或隘而少容均之非中也然君子曰與其放也寧
隘孟子曰人有不爲也而後可以有爲夫不爲者有
所執也猶然後能執夫苟有執矣必能決擇於是非
取與之間不爲物屈不爲利疚將於道幾矣而奚有
於從政哉雖然吾有以告宗介詩有之曰申伯之德
柔惠且直宗伯公明德令望含和挺直粹然中正而
天下儀焉宗介其亦歸而求之哉凡與宗介遊者皆
公之門人及禮部之屬也各賦詩餞之嵩承公命序
之

送僉事李君序

李君宗周將之四川按察之任人或曰語有之庖人
雖不治庖尸祝不越俎以代之夫俎豆軍旅異習州
邑蠻貊異觀禮樂政刑異施今之按察冠惠文衣繡
乘傳按行所部察冤抑糾貪墨其官刑官也李君造
屬乎春官之署耳孰典章目習儀數愉翼周旋優柔
平中行不矯厲言無朴囂一旦操吏案與珥筆者侶
責以獄訟之事無乃異乎予曰不然也夫禮與刑其
異體同用也經緯品節整齊民志是之謂禮束縛艾
刈禁戢奸慝是之謂刑昔者聖王防民之欲爲禮以
制之爲之宮室車輿之居有等爲之衣裳組紱之服

有式爲之尊彝鬯爵之器有度有朝覲聘問射御師
田之典有冠婚喪祭之儀使民習而行之不敢踰侈
冒僭遂其非分之爲其久也遷善遠罪被教成俗而
忠信仁義興焉自夫禮廢而後民蕩民蕩而後日陷
於刑辟而莫之禁由是不得已而用刑焉故禮者止
其未萌者也刑者禁其已萌者也異體而同用也夫
禮樂之教四達而天下治今天子稽古崇化超然
遠覽三代聖王之制興舉曠曠釐正訛謬條析儀度
粲然大備傳曰禮樂百年而興者其在茲歟海內承
德仁義忠順之行興政簡刑措之治致吾於李君之
行觀之矣

贈王子儀序

洞庭山在震澤中氣狀淑特涵浸巉巖爲吳奧區少
傳守溪公以名德大老實居其間高風峻節震耀海
內天子特遣大行人持詔即山中之廬致存問焉
欲起而授之政公曰吾老矣不可以復冒寵祿屣脫
世故惟與沙禽野老追逐於雲月之間嗚呼其誠樂
於此山者耶君子進則坐於廟堂得君行志致理於
天下退則處丘壑著書明道以覺來世公在正德初
入筦機務值權姦柄國奉身而退蓋歸十有餘年日

惟勘書著文精奧演迤極作者之趣而止則公雖未
竟其彌綸之業而陳義作則卓爾大雅振起斯文之
衰非來學之幸耶世之學士大夫思考德問業庶幾
一造公之堂而湖山夔僻渺不可即則徃徃幸見其
嗣人詢公之起居時問訊以致夫仰止之私故子儀
之官南都也人之愛之者有加焉子儀公之仲子也
以蔭補南京督府都事靜慎而和巽恭而執禮被服
無華章人之愛之又以其能子也故其以三載考績
而歸也衆相與謀繪圖賦詩佐其稱觴之慶而嵩遂
書所以爲公壽者致之俾歸而獻焉賦者八人出翰

林者五皆公之門人也其三人同里云

贈胡用甫序

祿與位世所慕以爲榮者也父母以是望其子子之
欲孝者以謂非是無以慰悅其父母之心讀書爲學
纂言爲文凡以爲仕祿之具而已是故雖有賢者不
能以自振也昔者七十子之學於孔子也其得以孝
稱者曰曾子閔子而已曾子弊衣而耕于魯之野閔
子辭季氏之宰曰如有復我者則吾必在汶上矣夫
二子者未聞其祿仕也學於聖門德成爲大賢名在
萬世其所以爲孝者如是耳矣今世之士不務曾閔

之學必謂祿仕爲足致孝其親則是今之士之孝其親顧獨優於曾閔者邪廬陵胡用甫氏始舉于鄉既而連舉進士不第來南雍學于後渠崔子之門崔子者文學論議高一世罕所許可獨心偉用甫語與終日用甫嘗學於西泉劉子爲古文詞簡健有法又嘗學于陽明王子習其說而宗之夫學以適道則不詖取正於君子則是非不謬德以弼之藝以祿之祿與位雖未至其得爲用甫病耶用甫間來語予曰二親年並六十羈業于茲不能有所順適其志若欲得予文爲壽者予故以是說張之書以壽翁孺人且諭諸鄉人曰無徒榮彼而易此也

贈嚴明府序

予聞今之最吏也曰其賦集也其訟理也其役均也其豪右戢而善良者植也賦之弗集訟之弗理役之弗均豪右肆而善良者弗植斯誠曠其職宜殿且罰賦集而已矣訟理而已矣役均而已矣奸戢暴禁而已矣亦吏之常耳不足道也昔者君子之論曰德成而上藝成而下行成而先事成而後夫仁義塞其中忠敬廉讓出於躬而孚乎其人所謂行與德也可尊者也師辨樂祝史辨祀吏辨文法所謂藝與事也可

後者也先王之世右賢左能其始也考行于里其舉而授之位也則公卿庶士皆得其才後世科目取士之制興而國論不及乎里巷之實士之進者類以淺薄浮蔓之文而其試吏也又嘗出其辨智敏給之才皆足以取譽故雖有好修之賢而才與藝或詘則世稱之者亦少焉嚴君季祥歸安人也數舉進士不利乃就常格得一令補吾邑君之爲邑四年矣集賦理訟均役戢暴不遺餘力校其能固不盡出世吏下也然君子所稱異於是曰君操志謹潔自其窮時物無苟取無飾行無諛詞其爲仕也約其身以及其妻子不敢慊其意之欲爲每飯脫粟安之嗟夫其所謂行成而好修有里巷之實者耶君將奏績於朝予故著是說以張之俟夫司陟明者擇焉

鈴山堂集卷第十九

鈴山堂集卷第二十目錄

序

贈太子太保元輔李公序

送戶部尚書秦公序

贈大宗伯月湖楊公序

贈大宗伯張公之任南京序

少司徒吳公考績序

少司空寇胡公赴召序

贈陸選之序

贈李運司序

藻者以文忠樸者以德而皆天下之才也苟有以與之將不勝其至而相道愈光是故晏然廟堂不動聲色士無賢不肖樂出其門下武夫隸人亦莫不想聞其風采覩之爲快而天子實恃以爲安此其樹風聲而布德澤也豈不遠哉嘉靖十年天子虛內閣之位久難其選中外之士相與議曰必序菴李公其人而已而 上出手勅果柄用李公士則相與賀曰是所謂休休有容者非耶公昔起翰林爲編脩已頎然有公輔之望及陞侍讀諭德學士歷二十餘年乃晉貳禮部遂正位宗伯當 聖天子禮樂維新之日贊翊

大議惇典正祀

上每有密諭親灑

宸翰稱爲大

宗伯而不名特賜玉帶銀章

璽書褒諭今晉秩官

保眷遇益隆而公謙慎抑畏常如一日未始少易其素平居無疾言遽色掩覆人過推引後進樂善如不及以故縉紳之士覲德誠服者不謀而同詞焉昔之論相道者必以蒐揚善類集衆思廣忠益爲賢然則光輔太平弼諧 中興之治公其果慰於士大夫之望哉公河間任丘人也其地實在瀛海之間嵩嘗以謂雄波鉅浸吞吐匯積鍾美孕粹必有異人者出焉觀於公偉度弘量其信然矣河間之仕于 朝者謀

屬言於嵩以爲公賀嵩昔在禮部獲辱察采涵沐淵
懿竊自謂知公之深而識其大者故借海爲喻

送戶部尚書秦公序

禹宅百揆臯陶爲士夷夔典禮樂垂其工益掌山澤
聖人之於國也用當其才而已矣夫舜之時賢才豈
可勝用哉然選於衆以爲是數職者非禹臯陶夷夔
垂益不可也而禹臯陶夷夔垂益者卒守其職而名
後世然禹臯陶夷夔垂益之才豈顧偏長於是哉惟
上所用試而輒效故賢才之名世也藝周於用而已
矣嘉靖改元之初 天子遴柬名德以補庶位一時

諸賢彙進論者欣欣然謂有虞廷之風焉于時錫山
秦公自都御史巡撫湖南召爲戶部侍郎公始舉進
士爲戶部屬即有名而久於其政其來戶侍也其尚
書爲孫公事多咨公以行今年二月拜爲南京大宗
伯其秋八月改大司馬奉勅參贊機務閱兩月竟召
爲大司徒蓋公之才無所不能而司徒之任必授之
不釋者詢謀僉同歷試既效之意也今天下大政寄
六部司徒掌邦計財賦調度金穀出入緒錯務殷其
任爲難比歲不登財匱而經費不給尤難也然則調
劑營度使公私給足而民賦可經官用有節而侈濫

以革非公其誰賴哉夫器隆然大者所受必弘山嶽之崇鉅也出雲雨而被四海公充養有道其德粹然謀謨經畧民物陰受其福而不自以為功所謂藝周於用治職而名後世以匹休古大臣君子之事者高不佞竊以是望公於其行也同留務魏國徐公保定侯梁公來屬贈言遂書以為贈

贈大宗伯月湖楊公序

政與學有二乎哉儒者明於仁義禮樂通乎古今治亂之理以至損益廢置始終緩急之宜無不知之其處一室而慮周乎四海九州之遠其出而效用小之

釐百司之務大之首丞弼之任無所施而不可何則其為道也兼乎實用而非空言其為事也達乎至理而非文具後世論政者乃或不本於學而志道者或不及於事蓋有繩趨尺步為謹嚴棲谷隱為高辨文析義為奧間試之政或迂僻固滯而莫能通至若應時達務剽繁理劇者問之大道則又忽焉不加之意而政與學二矣豈不重可歎哉大宗伯月湖先生楊公蚤有志乎斯道其學以伊洛考亭為宗而潛心當世之務凡民隱吏治兵政賦役以至星曆筭數之微莫不論著商確條理粲然要其所自得者深矣考公

仕宦所履歷在諫垣劇切時政凡所建白關涉大計
歷卿寺進貳禮部皆居南都號簡逸而嘗兼攝工刑
之政即究意殫力若真爲之迎刃發斲人輒稱善尹
京府時利病罷行倖私屏息皆前尹所未爲者蓋公
之學斂而愈章施而不窒明體以達用者乎然嵩嘗
以謂百司之務凡有材智幹局者皆能之至於文章
言議推理明法援古據義於以決疑定是論道弘化
者非儒學之臣不能也若公則真其人矣公平生論
治以君德成就必講學親賢爲要前後章疏屢屢言
之今天子進學之初取西山真氏大學衍義撮其
切要釐爲節畧上之使進而居密勿從容之地沃心
輔德裨益不少惜公既老而歸矣古之君子負堯舜
君民之志者不必其道之果行其退而寓諸著述以
明斯道於來世使推考其蹟而行之其所及者尤遠
則公之用所未究者其有待於此乎公行矣南都之
公卿自居守之長至百執事悵悵然以儒者之去爲
惜所謂疑孰與質政孰與諮而處考德問業之士孰
與依歸矧嵩也鄉後進尤不能釋於情者故敬以是
贈焉於乎公其何以教之哉

贈大宗伯張公之任南京序

荆與岳跨漢之南為州壤表而流匯炳靈毓秀而元夫鉅人出焉有若文定揚公居鼎鉉典密務有若文僖黎公登廷魁位宗伯兩公相望後先文章德業輝炳一世乃後四十年則有今陽峯張公云公舉進士甲科讀書中秘既乃職太史拜官諭學士揚英振翹文望蔚起 皇上緝熙聖學簡儒臣六人日侍講幄公叅其間公器貌端厚進趨雍雅敷陳古訓明鬯剴切 上每注聽焉冊立 皇太子妙選官府庶僚公以侍郎學士兼詹事府少詹事隱然公輔之儲矣會南大宗伯缺員下廷推至再凡擬四人以上 上特

以授公蓋重其選也公與文定生同邑而髫鬣時及受業文僖之門文僖固嘗以國士竒之妻之以其孫女今之往也實踐文僖舊所居之位行且被召命入輔左右駸駸乎匹休文定之芳躅矣嗚呼惟楚有國固多賢也乎哉夫賢才之生也資以為世用不獨為其一鄉之重而已而自一鄉論之其風氣之感召師友之淵源容有不可誣者公往在詞林涵養負挾見諸啓沃論議者彬彬乎其盛矣而施于有政寔自今始今兩京六曹並峙體勢惟均南京為我 皇祖肇造之區品式章程具在有司百餘年來防禁滋弛禮

文百度諸司庶府求正而取咨者惟公是望也公往
哉出其素所閱歷諳練之餘若駕輕駟就康莊若執
著蔡定衆志不但作式留都且爲他日贊元經化之
地矣嵩也獨縻于茲幸公之共察案獲鏃礪括羽之
益爲多而今則遠別以去能無介于懷哉故於九卿
諸大夫之合餞以觴也特以是道公之行詩曰維嶽
降神生甫及申言生有自也又曰維申及甫惟周之
翰言出有爲也

少司徒吳公考績序

處煩任重令修而政通民輯而邦理功之著也夫是
之謂才守道直已細矜而獨慎德立而譽光節之美
也夫是之謂行才行備夫是之謂士然予觀夫士方
年壯志銳意有所慕立名喜功之氣勝踔厲奮發以
美才竒節自見世多有之歲月既移所慕者獲能不
自怠者鮮矣歷蹈禍難頓踣困躓始終不自悔者其
尤鮮哉南京戶部右侍郎東湖吳公早有卓行舉進
士即上書言民所利病已駕軋行葦既而歷郡邑陟
潘臬副都臺出入兵戎錢穀之寄幾四十年前後抗
疏論事無慮數十中間忤權閹得罪幾斃蓋今天下
論舉難事劇司有餘力者論特立果行禍變不懼者

必僉曰東湖公云公頃自湖南召入爲兵部侍郎數日而有南京之命或意公不能無少望且囊括臍噬將亦少懲矣然公無幾微見顏面勤勞治職弛張興革勇往直遂壯銳者所不及復條時政十二事上之蓋公果毅揭揭自樹性然也當其意所獨至即舉世非之不沮不回政暇則繙閱羣籍名賢緒論吏治條貫以至器物名數罔不究切口誦手抄積於案几此豈有所悔而怠者乎夫論士者必原其志必徵其學必究其終志者衷之存也而誠難學者用之積也而不倦難誠不倦而後可終故終難即是而觀世固有卓詭烜赫可集事於一時而無建於永圖矯伉沽激可徼譽於一時而不競於晚節者其視公何如也當明聖渴賢之日衆方期公益究厥施以謀謨廟堂使天下陰受無智名無勇功之福亦公之志也而近且累疏辭位茲以考績經謀歸卧則賢者出處衆人固不能窺其際邪雖然公豈得終辭哉敬以是道公之行

少司寇胡公赴 召序

昔漢文帝時張釋之爲廷尉有犯蹕盜環者帝欲重其罪釋之曰法者天下公共也又曰法如是足也帝

許之申屠嘉爲相大中大夫戲殿上則檄召困辱帝
至遣使往謝丞相夫臣之執法也犯顏強諍而不爲
拂君之從善也改容異志而不爲難是故臣主之名
俱榮政令一朝廷尊而天下治後世尊君卑臣之分
嚴而左右讒間之說勝夫分嚴則情志隔矣讒間之
說勝則是非眩矣天子曰辟予曰勿辟由是辟焉則
爲濫罰天子曰宥予曰弗宥由是宥焉則爲縱惡於
是有逆耳之言有貌從之失而君臣之道多不克終
嗚呼難哉嘉靖二年秋刑部尚書見素林公既去位
上博采廷議以左都御史蓉溪金公爲尚書東魯
孟公廣平胡公則遞遷爲左右侍郎胡公自南京刑
部特召以入君子曰其民之望乎其國之榮乎其刑
平乎其弗濫弗縱矣乎胡公往年爲都御史巡撫大
同抗疏諫武皇巡遊拒逆彬之邀饋被斥卧家士
論躉之公性周練自始仕至今所治皆要劇有聲望
而飾之以文濟之以遠度茲往也有餘力焉況當
明天子聽言急治之朝諸君子同舟共濟之美則享
有其榮而無其難也庶將見之乎

贈陸選之序

選之拜福建按察之命其寮諸君相率請予言以爲

贈予聞之贈者有所增益之謂也選之受易學於尊
翁憲副妙齡擢上第伯季駢列華要稱文章家予則
何能有所增益哉選之爲儀部二年當 聖天子稽
崇古制遠覽哲王廼議祀天禮地朝日夕月 皇后
始蠶于宮原徵建嬪御爲宗社長慮維時百禮叢舉
古儀罔攸見尚書李公受 上密命宸翰日馳乎南
官之署公討析疑義區畫詳定入贊大猷不遺餘力
而選之實分理厥務操牘書奏或受公意指或自出
創構簡故實據經制倉卒取具事理粲然而詞誼勁
切敷奏惟允予叨部貳愧不能出一語爲助然則予

何能有所增益哉雖然予亦安能已於言夫世所稱
以謂難得者精明博洽敏贍之才既得之矣施於有
政若健翮乘長風高屋建瓴水驅駟馬騁康莊恣所
往而莫之禦也然君子之論屢歎夫才之難得又病
夫時之難爲夫強明矯拂直己而自遂奮不度時勢
之宜其失也激媿媿脂韋懷利而避害昧是非決擇
之正其失也隨隨不足道也而激豈事之得哉誠得
夫大雅明哲之君子相與同舟而濟庶幾協靖共之
誼敦匪懈之忠不要譽而亢不枉道而同以登濟茲
治君殆近之矣乃遽別以去予能無介然于懷耶序

以贈其行嗟乎選之何以處我

贈李運司序

易曰何以聚人曰財夫財者王者所恃以合天下之衆也周禮一書理財居其半聖人思理財之難故制爲法纖悉備密擇吏而慎守之故吏者天子所恃以守天下之法也吏不良則法廢而莫守法不守則財弊而莫理財莫理則天子不得享其利貴倖強右從而蟠互牟效其間非獨貴倖強右從之賤夫皆能私其取予騁智擅力以恣其非望之欲甚則由是啓釁而貽害夫廢法爲治雖堯舜猶難之

況世主橫濫不經之費欲持此而幸天下之給足其將能乎今之鹽課國用所需財政之大者也特置運司以領之其長曰使曰同知皆秩高而位寵常選諸吏有材諳勞績者表用之戶部郎中新城李君擢爲兩浙運司同知君初爲令爲州守爲揚州同知以入戶部前後皆有財政君皆優爲之揚爲兩淮運司所治君徃居其間則其吏能否政利病修廢蓋習見飮聞之而槩於中久矣蓋今百司具有已成之法惟明習慎操之自足以致治況以君屢試既效之能齟政其無難矣乎部察諸君子來求予贈言故以是書之

贈易揚州序

四海九州之遠閭閻幽隱疾痛之情勢有所不得達於天子之庭天子以拊循安集寄之於刺史縣令刺史縣令於民近而易知也其情幽隱疾痛得於目易見也以易見之近告易知之事由是下之情得不鬱而上聞君之澤得不壅而下究雖有水旱凶荒之變而民不病故曰天子所與共治天下者刺史縣令而已今州縣之灾甚矣淮之南北連數州之境亢旱淫潦夏秋相仍暴殄蕩廬杼柚蕭然流離傭丐殍死者屬於道藉使令者弗治守貽弗恤如吾民何易君之守揚州也始至則親以身當風炎日燠之毒以行禱羣祀浹旬當饋而歎方寢而不寐又已責弛禁抑價平糴列狀書奏天子於是寬蘇之詔有賑濟之使夫菑沴堯湯之世所不能無也惟得人焉以求拯補之術則民恃無患雖飢且瘠而不至盡委溝壑而今世吏其漠然者固無足責幸知其急而欲拯之者其力與才又不足以集事如易君者既不忽於民而力又有餘則為之民者庶幾其有賴乎初君將之官尚寶卿鄭公屬嵩為贈言諾焉而未及復也及是揚之士以君治狀來告則以是為贈庶幾以慰君之志

而相其勤焉耳

贈蕭提學序

人才風俗之未盡復古也其有由乎古之教也以德
今之教也以法以德者其本在躬行入於人者漸而
須其遲久之功以法者其要在禁制吏不得久其職
而責效於欲速古之人自幼至長未嘗去於學也詩
書六藝之文祭祀鄉射讀法之儀春秋合樂攷藝選
言之政以至論獄出兵授捷之法教之之術無所不
具也磨揉遷革使易其志而卒歸於善自其動作食
息身心性情之始而化民成俗常必繇之其究也公

鄉士庶皆得其才仁讓孝悌忠篤之風興於家而行
於鄉邑於乎是豈一朝一夕之致哉後世學校之設
自國都以至郡邑聚徒而教之擇吏以司訓勅品式
法意猶夫古也而士所習者文焉已矣有司者操尺
寸以臨之視其藝之工拙功力之勤惰評隲而勸懲
之已矣其所以長育成就之實則非古也蕭君子雖
之督學南畿也數爲予道陳克菴戴恭簡之賢二公
者嘗以御史督學於斯者也陳公動則古人力變故
習以身爲教令諸生讀小學習冠婚祭儀後遷副使
提學河南戴公考校以文藝占器識有請謁者遜不

色拒而終一無所撓後遷副使提學陝西二公敷歷中外稱爲名臣而學政尤著跡其所爲先德義而後文詞先化導而後防督皆世所不暇爲者於是知蕭君善自擇而慕焉者也君之擢河南也仍以副使督學又適與二公類夫君子之尚友也苟擇其善而師焉無不至也況又進焉吾安知其所先後哉抑吾聞後世之吏得行其志者難也蓋其所操以爲評隲懲勸之具者不得不任乎法也而人之責乎已者備舉法而繩之不幸一不當其意則怨且讟隨之況起而撓之矣非篤信不惑強立無懼者其不怠且沮耶君

往哉弗怠弗沮尚久而須其成焉庶幾吾見復古之盛矣

鈴山堂集卷第二十



